

MOSE LEKHABU MASA GENESIS

KITI

SEMTILBU

Leiset le Mihem kisem

1 ¹Semtilin Pathenin Vanle leiset ahinsem tai. ²Ahin leiset chu alimle agong bei ahinalaiyin, twipi thuh tah-in aki-khangin achunga thimpi ana jinge; hichea chun Pathen lhagao twi chunga analam lenglen ahi.

3 Chuin Pathenin "Kho hungvah nen," atileh, kho ahungvah tai. ⁴Pathenin khovah chu aven ahile aphalheh jengin, hijeh chun Pathenin khovah le muthim ahinsep khentai. ⁵Chua chun Pathenin khovah sun asah-in muthim chu jan asahtan ahi; chuti chun nilhah ahung umdoh-in jingkah jong ahung umdohtan ahile nikho khat ahitai.

6 Hichun Pathenin, "Twipi lah a chun vanthamjol hung kidal hen lang twipi chu alang langa daltan hen," atin; ⁷hiti chun Pathenin vanthamjol ahinjamdoh paiyin, vanthamjol noiya twipi le vanthamjol chunga twipi chu adaltanton ahile akikhen lhontai. ⁸Pathenin vanthamjol chu van asahtai; hiti chun nilhah khatma ahung umdoh-in jingkah khat ahung umdohtan, nikho ni alhingtan ahi.

9 Chujouvin Pathenin, "Vannoiya twipi mun khat'a hung veikhom hen lang chutengle leiset tolgo jong hung kilahdoh hen," atileh, chutobang chun ahung um jenge. ¹⁰Chuin Pathenin jong tolgo lai chu leiset asah in chule twipi veikhom chengse chu twikhanglen asahtai. Pathenin aven ahile apha lheh jengin ahi. ¹¹Hichun Pathenin, "Leiset'in hampa, amunei hamphung, agathei thingphung, aga achi dinga amunei cheh, ama ama chi dungjui cheh-in hinsepdooh hen lang leiset chunga hung kehdoh-uhen," atileh; hiti chun ahung kehdoh tauve. ¹²Leiset'in hampa ahinsepdooh tan, hamphung ama

ama chi dungjuiyin ahung kehdoh-in, agathei amunei thingphung ama ama chi dungjui yin ahung kehdoh tauvin ahi. Pathenin avet leh apha lheh jengin ahi. ¹³Chuti chun nilhah khat le jingkah khat ahung umdoh-in nithum alhingtai.

14 Pathenin, "Sunle jan sepken dingin vana vanthamjola avah thei vah ho hung kigol uhen lang, hiche ho chu kum kihei chin melchihnan jong, nikho simtohnan jong chule kum simtohnan jong pangu hen, ¹⁵chujongle hiche ho chu vana vanthamjola konin leiset salvah-in pangu hen," atin ahile, hiti chun aumtai. ¹⁶Hichea chun Pathenin vah alen cheh ni asemin, vah alenjo chu sunlaiya thunei dingin apansah-in, chule vah aneojo chu janlaiya thunei dingin apansahtai; hiti chun ahsin ho jong ahinsem tai. ¹⁷Hichengse chu Pathenin vana vanthamjola chun agolin, leiset chung salvah dingle ¹⁸sunlaiya thunei ding, janlaiya thunei ding, chule khovah le muthim sepken dingin apansahtan ahi. Pathenin aven ahile apha lheh jengin ahi. ¹⁹Chuti chun nilhah khatle jingkah khat ahung umdoh-in nikho li alhingtan ahi.

20 Chujouvin Pathenin jong. "Twipi hin ahon hona kijotle ding ganhing tamtaah hinsepdooh hen lang, chule leiset chung vana vanthamjola jong vachate adung avaiyin hung leng leu hen," atin; ²¹hiti chun Pathenin twikhanglena ganhing lentah tah le ahing thei adang dang, aki jotle dingin asemin, hiche ho chun twi akidilsah sah-uvin, ama ama jat cheh-in alhauvin ahi, chujongle ajat jat'in alhanei vachate jong asemin ahi. Hichu Pathenin avetleh apha lheh jenge. ²²Abonchauvin Pathenin phathei aboh-in, "Hinphauvin lang punguvin, twikhanglena twi lah

dimset'uvin, chule leiset chunga vachate jong pungu hen," ati. ²³Chuin nilhah khatle jingkah khat ahung umdoh-in ni nga lhinna ahitai.

24 Chuin Pathenin jong, "Leiset'in ama ama jat dungjui cheh-in ganhing hinso doh hen lang, ina vah ding gancha hihen aop'a kithol ganhing ho hileh chule leiset chunga gamsa ho hijongle ama ama jat dungjui cheh-in hinso doh hen," atin, hitobang chun ahungsoh doh tan ahi. ²⁵Hijeh chun Pathenin leiset chunga gamsa ama ama jat dungjui cheh in asemin, ina vah ding gancha jong ama ama jat bang bangin, chule tola kithol ganhing ho jong ama ama jat dungjui cheh-in asemtai. Pathenin aven ahile apha lheh jengin ahi.

26 Hichun Pathenin jong, "Eihon eihon lim hin eihon tobang mihem sem uhitin, chuteng amaho chun twikhanglea nga ho-chung hihen, vanlajola vachate chung hihen, ina yahthei ganchate chung hileh, leiset pumpi chung hihen lang chule leiset chunga aop'a kithol chengse chung hijongle thunei vahomin pangu hen," atin; ²⁷hiti chun Pathenin Ama lim mong mongin mihem chu ahinsemin, Pathen lim tobang bangin amapa chu ahinsematai, Pasalle numei asemdohtan ahi. ²⁸Pathenin amani chu phatthei aboh-in, chule ajah lhona, "Hinpha lhonin lang pung lhonin, leiset chung hung dimset lhonin, nathun nunsah lhon tan; chujongle twikhanglea nga ho hihen vanlajola vachate hi leh, chule leiset chunga lhale ganhing jouse hile achunguva thunei vahomin pang lhontan," ati. ²⁹Pathenin hitin jong aseiyin, "Vetan, keiman leiset chunga muchi phung jouse le thing gathei amunei jouse abonchan nangni kapedoh tai, aboncha hi neh le chah a naman lhon ding ahi. ³⁰Chule leiset'a gamsa hihen lang chunga leng vachate hileh, tola kithol ganhing hijongle, ahingthei hinna nei chengse chu

aneh achah dinguva hamhing pou pou hi kapehdoh ahitai," atin; hitobang chun aumtai. ³¹Hichun Pathenin athil semsa chengse chu abonchan aven ahile, vetan aphabeh seh jengin ahi; hichea chun nilhah khat le jingkah khat ahung umdoh-in ni gup lhinna ahitai.

2 ¹Hiti hin van le leiset chule asunga thil-jouse akisem joutai. ²Pathenin ni sagi lhinnin athilsem abonchan ajousoh tan, hijeh chun ni sagi lhinnin athilbol anatoh chengsea konin akicholdotai. ³Athilsemna anatoh chengsea kona ni sagi ni chu Pathenin kicholdo na aneijeh chun hiche ni sagi lhinni chu Pathenin phatthei aboh-in asuthengtan ahi.

4 Van le leiset ahung kisemdo a akhanggui hung kipatdoh dan ho chu hiti hi anahi. Pakai Pathenin leiset le van ahinsem patni chun, ⁵leiset chunga tollhangga jong hamphung akeh hih laiyin, tollhangga chun loudong ima jong ahung dondoh hih laiye; ajeh chu Pakai Pathenin leiset chunga go ajuhsah hih laiyin, chule loubol ding jong mihem ana um hih laiye; ⁶leiset'a konjoh chun meijun ajamdoch jin chutngle leichung ahinle chapkot jin ahi. ⁷Hichun Pakai Pathenin tola leiset leingan hin mihem ahinsemin, mihem nahhom te ni sunga chu ama hinna hu ahailutpeh a ahile mihem chu-mihing khat ahung hidohitai.

Eden Hon

8 Chujouvin Pakai Pathenin jong niso lama Eden muna chun hon khat abolin, hikoma chun amihem sempa chu akitai. ⁹Pakai Pathenin hon leilai sunga kon chun vietnom nomle neh dinga atui tui thingphung tamtah ahinkedoh sah-in, hon lai lunga chun hinna thingphung jong akeh-in, se le pha hetna thingphung jong akeh-e.

10 Edena kon chun honlei chapnou dingin vadung khat ahung longin vadung chu lhalka ka lin along khenin, vadung li

asohdoh paie. ¹¹Vadung khatna chu amin Pishon ahin, hiche hi ahi sana umna Havilah gam pumpia long kimvel le chu. ¹²Chuche gama sana chu ahoi thei lheh jengin, samphai change songval chang jong akimui. ¹³Vadung ni lhonna chu amin Gihon ahin, hiche vadung hi ahiye Cush gam pumpi kimvela long lhung keiya chu. ¹⁴Vadung thum lhonna chu amin Hiddekel ahin, Assyria niso lama alonge; chule vadung li lhonna chu Euphrates ahi.

¹⁵ Chuin Pakai Pathenin mihempa chu Eden hon sunga apuilut'in ahonlei bol dingle angah dingin apansah tai. ¹⁶Pakai Pathenin mihempa chu thu apen aseiye. "Nangman honsunga thingga jouse nanop nop'a naneh thei cheh ahin, ¹⁷amavang se le pha hetna thingga khu naneh lou hel ding ahi; ijeh-inem itile hiche khu naneh ni ni leh nathi tei tei ding ahi," ati.

¹⁸ Chujouvin Pakai Pathenin jong, "Mihempa achangseh a aum hi anompoi, ama kithopi dingin aki ang ngatpi ding khat sempeh ing kate," ati. ¹⁹Pakai Pathenin leigan chun gamsa jouse ahin, chunga leng vachate ahiuin ahinsem doh-in, hiche ho ipi pi ahisah am, ti yet dingin mihempa henga chun ahin hoilutsuh keiye; hichea mihempan ganhing ho aminova na tapou chu amina pangden ahi-tai. ²⁰Hiti chun mihempan jong gancha ho jong amino cheh-in, chunga leng vachate ahiuin chule tollhangga gamsa ho ahiuin amino soh keitai; ahin mihempa ding chun akitoppi ding aki ang ngatpi thei akimudoh hih laiye. ²¹Hijeh chun Pakai Pathenin mihempa chu aihmut milsah-in, aihmut lan chun anahgu khat akeh lhan, anung chu aphen atomjol peh-in, ²²chuin Pakai Pathenin jong mihempa a kona ahe lhah anahgu chun numei khat asemdoch-in amanu chu mihempa henga chun ahinpui lut'in ahi. ²³Hichun mihempan jong, "Tua kilhab hiche gu hi-keima gua kon ahin avou-

jang jong keima voujanga kon ahi, hijeh a chu hiche hi numei kiti ding ahi; ipijeh-inem itile amanu hi pasala kona kiladoh ahi," ati. ²⁴Hiti ahijeh a chu pasalin apa le anu alha kanga ajinu akolchahjoh ding, chutengle amani chu phe khat vou khat hilhon ding ahi. ²⁵Hichepet chun mihempa ahin ajinu ahin anigel lhon chun asagoh keo ahinalai lhonin, ahivang-in akijapi lhon hih hel'e.

Mihem Chonsetna Alhah

3 ¹Hichelai chun Pakai Pathen thilsem lah lah a gul chu thilsem gamsa dang jouse sangin adu-ha thuh penin, ama chun numeinu jah a, "Hona thingga hi aboncha na neh lhon lou ding ahi, tia Pathenin asei tahbeh mong ham?" atile, ²numeinun jong gul jah a chun "Hona thingga kaneh lhon ding ahinai, ³ahin hon lailunga thingga vang khu Pathenin na neh lhon louhel ding, lo jong nalo lhah lhon louhel ding ahi, nabol lhonle nathi jeng lhon ding ahi, tin aseiye," ati. ⁴Hiche phat chun gulin jong numeinu jah a, "Nathi tah beh lhon louhel ding ahi. ⁵Ajeh chu hiche naneh ni ni lhonle chun namitlam lhon kikeo doh-intin, Pathentoh nabah lhona thilpha thilse hetheiya naum lhon ding ahi ti Pathenin ahetjeh a asei ahbove," atitai. ⁶Hichun numeinun jong thingga chu aven ahile neh dingin apha lheh jengin, vetrok nom aumtan, athingga chun mi achihsah jeng ding jeh chun ahaduchat cheh tai, hijeh chun aga chu akilo lhah-in anetan ahi; amanun ajipa jong phabep apen, amapan jong anetai. ⁷Chutah chun agigel lhonin amitlam lhon akikeodoh tan, asagoh keo ahilhon jong akihetdoh lhonin, hijeh chun theichangna chu akil mat mat lhonin kaipelengin akikhailhon tan ahi.

⁸ Chuin nisa dailhah lamin hon sunga chun Pakai Pathen avah le len ahile mihempa le ajinu chun ahusa ajalhonin. hijeh chun honlai lunga thing lah a chun amanitah Pakai Pathen masanga aksel

Ihontai. ⁹Ahimla Pakai Pathenin mihempa chu ahinkouvin ajah a, "Hoilama umah nahim?" atile; ¹⁰amapan jong, "Hon sunga nahuza kajah a ahile kasagoh keo kahijeh a kakichat'a hijeh a chu kisela kahi," ati. ¹¹Hichun aman jong, "Koitham nangma nasagoh keo nahi tia naseipeh a chu? Nehih beh-in tia kathupeh thingga chu naneh khattou hitam?" atileh; ¹²mihempan jong, "Keima eilen-khompi dinga nangman neipeh numeinu hin thingga chu eipen kananetai," ati. ¹³Chuphat'in Pakai Pathenin numeinu jah a, "Ipi bola hitobang pi hi nabol hitam!" atin ahile numeinun jong, "Hiche gul hin ejol jol phat'a kaneh ahibove," ati. ¹⁴Hichun Pakai Pathenin gul jah a chun,

"Hiche pi hi nabol tah jeh-in,
Gancha jouse lah jong,
Tollhangga gamsa lah a jong,
Nangma gaosap changa nahi tai.
Nahinkho lhumkeiya na op'a nakithola,
Leivui naneh ding ahi.
¹⁵Keiman nangle numeinu kah a,
Nang chilhah le amanu chilhah kah
a kidouna kakoi ding,
Amapa chun nangma luchang avohchip
a,
Nangman amapa khotaljum navoh-
chip peh ding ahi," ati.
¹⁶Aman numeinu jah a chun,
Keiman nang dinga gim gentheina
tamtah kasemdoh peh a.
Nao navop teng jongle naoso nat
gentheiya cha nahindoh ding.
Najipa jeng lha-ngaiya na um ding,
Aman nachunga vai ahom ding ahi," ati.
¹⁷Chuin mihempa jah a aman,
"Nangman najinu thu na ngaiya,
'Naneh lou hei ding ahi,'
tia thu kepehsa thingga naneh tah
jeh-in,
Nangma jeh a leiset jong hi gaosap
chang ahitai;

^{3 : 13} 2 Cor. 11 : 13; ¹ Tim. 2 : 14; ¹⁰ 3 : 15 Rev. 12
^{4 : 4} Heb. 11 : 4.

Tohgitme hesoh genthei thoh pum
puma,

Nahinkho lhumkeiya nieh nakihola
naneh ding ahi;

¹⁸Chule nang doudin theimi ling le mei-
thai seltho ling hungkeh intin,
Chujongle tollhangga anche lou-
hing naneh ding ahi.

¹⁹Leiset'a kiloidoh nahijeh a leiset'a naki-
lekit kah a,

Namaiya ulsa long longa anneh naki-
hola naneh ding ahi,

Ijeh-inem itile nangma leivuibo nahin,
Leivui nalesokit ding ahiye," ati.

20 Mihempan ajinu chu amin Eve
asahtai, ijeh inem itile amanu chu mihing
namkim dinga mi nu ahitan ahi. ²¹Chuin
Pakai Pathenin mihempa le ajinu ding
chun savun ponsil asempeh-in, anilhon
chun asilpeh-in ahi.

22 Hichun Pakai Pathenin, "Ven
mihem hi eiho lah a khat tobangin thil-
pha thilse hetheiyin aumtai, hijeh chun
ijem itile tun jong hinna thingga khu kilon
tin hinne leh atonsot a hing den ding ahi,"
atin: ²³hichejeh chun Pakai Pathenin
amapa chu, leiset'a kon a kiloidoh ahijeh
chun leiset loubola kovah dingin, asol-
mangtai. ²⁴Hiti chun mihempa chu adel-
mangin, Eden hon niso lama chun hinna
thingphung lampi ngah dingin Vantil
lhanei chu achensah-in, chule chemjam
koujeju chu akipei kimvelte sah tan ahi.

Cain Le Abel

© The Bible Society of India 1983

THE HOLY BIBLE

Kuki—Reference Edition—Copies 1500/83

The Bible House

Students' Field

Shillong-793002

PRINTED IN INDIA

BY PHOTO-OFFSET AT SWAPNA PRINTING WORKS,
52, RAJA RAMMOHAN SARANI, CALCUTTA-700009